

# Mahathir: EAEG tak menutup peluang negara2 lain

JM 18 MAY 1991

**K**UALA LUMPUR 17 Mei — Kumpulan Ekonomi Asia Timur (EAEG) yang dicadangkan tidak akan menutup peluang perdagangan kepada negara - negara lain, termasuk negara - negara Eropah Timur dan Tengah, kata Dato' Sri Dr. Mahathir Mohamad.

Sebaliknya, Perdana Menteri berkata, ia selaras dengan obligasi Perjanjian Am Perdagangan dan Tarif (GATT) dan akan memelihara sistem perdagangan berbagai hala.

"Ia sebenarnya akan menjadi forum perbincangan ekonomi serantau bagi mengekalkan perdagangan bebas," katanya ketika berucap di majlis makan malam meraikan Perdana Menteri Re-

publik Czech dan Slovak, Dr. Marian Calfa di Sri Perdana malam ini.

Beliau berkata, EAEG akan berusaha untuk memaksimumkan peluang perdagangan dan pelaburan di kalangan ahli - ahli dan dengan lain - lain negara perdagangan.

Justeru itu, kata Perdana Menteri, negara - negara seperti di Eropah Timur dan Tengah yang sedang cuba mengintegrasikan ekonomi mereka dengan ekonomi antarabangsa, tidak perlu bimbang kawasan pertumbuhan yang pesat akan ditutup kepada mereka.

Katanya, usaha bersama Malaysia dan Republik Czech dan Slovak untuk meningkatkan ker-

jasama ekonomi dua hala adalah selaras dengan langkah untuk memajukan EAEG.

"Adalah menjadi harapan kami agar kerjasama ini dapat dijadikan jambatan bagi memperluaskan hubungan ekonomi di antara Eropah Timur dan Tengah dengan negara - negara rantau Pasifik," tambah beliau.

Dato' Sri Dr. Mahathir berkata, Malaysia sedih adanya usaha - usaha untuk menyekat sesetengah negara di Asia daripada menjadi maju.

Justeru itu, kata beliau, Malaysia mencari jalan untuk memperkukuhkan ekonomi dengan membentuk kerjasama yang le-

bih rapat di kalangan negara - negara Asia Timur.

Menurut Perdana Menteri, kegagalan rundingan Uruguay adalah berita buruk bagi negara - negara seperti Malaysia yang memerlukan suasana perdagangan yang teratur dan terbuka untuk maju dan tumbuh.

"Sementara negara - negara perindustrian banyak memperkatakan tentang kebebasan dan demokrasi, mereka nampaknya enggan mengambil langkah perlu untuk mengekal dan memperluaskan sistem perdagangan antarabangsa yang amat penting bagi menjamin kebebasan dan demokrasi yang mereka laungkan," ujar beliau.